

四明叢書

張宗祥



00
2
10

清溪遺稿

四明張氏約園開雕

序

易稱言有物元微之稱漢人之文非有爲而爲則不妄
作今讀清溪錢先生之文而益信然其文存者不滿三
十首蓋先生歿後其子廉搜求而僅得者也朱明之有
天下承宋元後道學甚盛道學盛而節義昭又有康齋
敬軒陽明戴山諸公益講明而振厲之故明末多忠節
之士幾比于東漢清溪其一人也清溪始從鄒元標學
旣成進士益師友戴山諸賢以道學自勅歷官至刑部
主事累上章論時事尤以振學術復書院爲意而疏奏

詳切一覽卽得其旨非若宋人上萬言書不獨使時主不能終覽卽後世賢君相欲讀之亦且倦然思臥矣且清溪所言多按切時勢動關風教萬充宗至比之諸葛公李令伯文文山豈不以其言之有物多有爲而爲者哉君子之生世也豈獨力學期爲賢善而已凡與吾接者甚乃及于天下後世之人皆欲期其爲賢善亦非特不爲惡而已也卽時甚亂風俗甚下必將挽而振之蓋被君子之憂患也恆亟亟不可自己若飢寒之迫其體豈無故哉抑風教之移易往往繫諸一大儒之身則

講明道學以扶持倫紀豈非平治之要道乎因取清溪
文刊之非僅蒐輯前賢遺文區區微意尤冀覽者會之
云民國二十年八月後學張壽鏞序

序

清溪錢先生旣沒三十有六年其子廉集其遺文而刻之疏三說帖三揭一序十六刻旣成命斯大爲序序曰此不足以盡先生之文然而先生生平梗概約略可見矣先生一生清白自矢正直自持居家則盡孝在官則盡忠凡其發言處事無不可以對大庭廣眾無不可以質天地鬼神著述最多沒後卽遭國變時廉方在抱母高恭人攜之避難朝東暮西奔走無寧日兵燹寇盜不啻再三用是遺文散逸迨廉長而搜討則僅止此矣嘗

持之而泣語斯大曰吾先君之文至於吾身而所存僅止此也吾將何以爲人斯大慰之曰文不在於存之多寡唯視其繫於綱常名教與其能行與否而已矣有出師二表卽可得其爲忠臣不必他文也有陳情一表卽可知其爲孝子亦不必他文也樊紹述詩文之多昌黎謂古未嘗有而今世不多見焉惟其無繫也故夫文之有繫者一二篇不爲少文之無繫者千百篇不足多今試取先生之文而讀之於諸疏見其風節亦見其經濟於諸帖見其辨職亦見其慈愛於終養揭則見仁孝之

誠也於傳習錄諸序則見學術之正教人之善也於得
士錄科諸序則見樂育人才以備國家之用也讀之終
卷曾有一之不繫於綱常名教者乎故三帖所陳當時
卽著爲令而入事疏則談孺木之國權詳載焉世有不
知先生者讀此而可以知先生矣又奚病於存之不多
也嘗見先生家書手蹟有云寇至我必死汝等不必來
此服闋入京寄恭人者其後督學山左旣謝事值邊警
迫臨清失守先生在濟身宿城頭捐資餉軍誓與城存
亡然則能文者未必能行於先生又何譏乎先生從學

南臯子而劉戡山倪鴻寶吳磊齋金正希諸公皆交好
無間嗜善若渴嫉惡如仇故處水火交訐之朝能卓然
有以自立雖嘗一受誣誤旋以戡山之言而遂白師友
如此又可以知先生矣先生諱啟忠字沃心崇禎戊辰
進士廉字穉廉吾友也康熙戊午冬十月同里後學萬
斯大拜撰

清溪遺稿目錄

請復書院疏

敬陳八事疏

清理淹獄疏

疏通獄囚說帖

修理新監說帖

相埋故犯說帖

乞代題終養揭

刻傳習錄敘

二程子語錄序

何心隱先生集序

饒氏五經纂要序

虔言參同序

星渚人文序

楚聞得士錄序

東昌錄科序

青州錄科序

登州錄科序

萊州錄科序

濟南錄科序

兗州錄科序

山東鄉試齒錄後序

山東壬午科武舉試錄後序

平寇饒歌後序

補刻

與守令振荒書

壽果齋邵先生序

李卓吾制義小引

古庭禪師語錄序

紫柏集摘要序

重刻孝經序

清溪遺稿

明鄞縣錢啟忠沃心撰

請復書院疏

登第後上

奏爲聖治彌光聖學彌大乞盡復書院之舊以崇正學
以培節義事臣東海豎儒蒙聖天子培植自公車續食
以來其沾被聖恩至優渥矣髮膚非臣有況肝膽素抱
鬱積願吐冀以仰裨聖治萬一者敢不直瀝於君父之
前乎伏念臣從父兄讀書時時以聖賢相砥礪若漢之
節義宋之理學輒心向往焉至我朝而節義理學合而

爲一直足以凌轢前代於都不朽矣不意逆豎煽禍禁錮理學使節義兩字反滋亂臣賊子之口實臣是以不勝感憤焉大凡節義每從理學出歷代名賢不具論卽如臣鄉之于謙胡世寧王守仁等戡難定亂不撓不屈真可指數大都烈烈轟轟致身君國皆因師友平日講究以忠孝大義了了胸中故大難當前各能不負所學然則講學之興廢直關世運之汙隆不容以忽視者也今之非毀道學者不指爲標榜門戶則指爲假竊名譽夫倚門傍戶釣譽沽名之徒倘亦有之然似終不可以

亂真而噎終不可以廢食也寧容概爲抹煞哉藉令學
果當禁則夫子所云學之不講中庸所云博學審問慎
思明辨者將盡成虛語而三代時庠序之外必噤口不
談學而後可臣觀崔魏擅權亂政一時勢燄赫奕舉國
若狂苟且以赴功名之會乾兒義子人頭畜鳴排擊忠
良所在講學書院或變價或拆毀里巷三尺童子無不
唾罵而中朝頌德稱功建立生祠者轉相效尤侈鳴得
意斯亦孔孟學術一大薄蝕也推原其故由諸臣平日
理學弗明不識節義爲何物但知有好邪不知有君父